

REGIONAL NEWS BULLETIN
HEADLINES (EVENING)

Date – 22/04/2025

Time - 18:30 Hrs

1. Ni hnih cham tur sorkar laipua Planning, Statistics and Programme Implementation changtu Minister of State Pu Rao Inderjit Singh chuan vawiin khan Mizoram a lo thleng.
2. Mizorama kuhva chingtu pawl te chuan kuhva man sa lila-a hralh a ni chu an hriatthiamloh thu an sawi.
3. Prime minister Narendra Modia chuan ni hnih cham turin vawiin khan Saudi Arabia khawpui Jeddah a thleng
4. Union Public Service Commission (UPSC) chuan vawiin khan civil services exam 2024 result a tihchhuaah Shakti Dubey-i chu pakhatna a ni.

<><><>

UNION MINISTER

Ni hnih cham tur sorkar laipua Planning, Statistics and Programme Implementation changtu Minister of State Pu Rao Inderjit Singh chuan vawiin khan Mizoram a lo thleng.

Minister hian Aizawla Planning & Programme Implementation Conference Hall-ah thutkhawm a kaihrui a, Union Minister of State hi zaninah Raj Bhavan-ah a riak ang a, naktukah Hnahthial a tlawh ang a, Hnahthial DC Conference Hall-ah sorkar laipui ministry hrang hrang programme tih hlawhtlin a nih dan a ennawn pui dawn ni.

Union Minister of State Pu Rao Inderjit Singh chuan India state hrang hranga district hnufum (Aspirational District) 112 thlanchhuahte tihhmasawnna tur a vil bik an ni chu ngaih pawimawh tur a nih thu sawiin, Niti Aayog hnuai a hmasawnna tehfung hrang hrang hrechiang tur leh awmze nei tak a hna kalpui turin kalkhawmte a chah a. Niti Aayog-a thawktute nen inpawh tak a inbetawn reng thin turin a chah baw. Kan corr report I lo ngaihla ang

Union Minister of State hova thutkhawmah hian Mizoram dinhmun hriatchianna tur, Survey hrang hrang buatsaih tur a thawktute tan a Training mamawh a nih dan te tarlan a ni a. NITI Aayog hnuai a hmasawnna tehfung hrang hranga Mamit District dinhmun tarlanna leh hmachhawp awmte sawi ho niin, inkalpawhna changtlung zawk peihfel a nih hun ah chuan hmasawnna hna chak zawk a kalpui theih beisei a nih thu tarlan a ni baw. Pu Rao Inderjit Singh chuan Aspirational District-a Deputy Commissioner-te chu an District chhunga harsatnate hrechiang a, sukiang tura ruahmannate siam hmana an awm a pawimawh thu a sawi a. Mizoram state chhung ah Corporate Social Responsibility (CSR) tam zawk a luh theih nan tan a lakpui tur thu leh Multi-Dimensional Poverty Index buatsaih a pawimawh thu a sawi baw a ni.

<><><>

MOTHER EARTH DAY

Vawiin hi mihringte chenna leilung ni, International Mother Earth Day a ni a, he ni pual hian Pachhunga University College chuan an college leh a chhehvelah Principal Prof. H. Lalthanzara hoin ah hun an hmang. PUC Principal chuan kumina International Mother Earth Day thupuiin a tum chu khawvelin mihring te hman tangkai theih tur chakna tha hrui a pekchhuah, renewable energy hrang hrang te tangkai leh uar zawka hman a nih thu a sawi a. Hemi chungchang inzirtirna chu an college in kawng hrang hrangin vawiinah hman a nih thu Akashvani a hrilh.

Vawiina Pachhunga University College in International Mother Earth Day an hmanah hian he ni chungchang inhrilhfianna hun leh bawlhhlawh chhar faina hun te college huamchhungah hman a ni a. Hemi zawhah hian he ni chungchang puangzarin College Veng field thleng kawng zawhin hun hman a ni a, Bethlehem Veng lam panin kawng an zawh chhunzawm a ni. International Mother Earth Day puala kawng zawhah hian zirlaite chu chenna leilung tichhe lo turin an intiam baw a ni.

Aizawl Meteorological Centre Director Pu Sudheer Kumar Dwivedi chuan Indian Meteorological Department Director General Dr. Mrutyunjay Mohapatra kaihruiaina hnuai ah International Mother Earth Day pualin hun an hman ve thu a sawi a. Thutiam te sawi rualin he ni pual hian school naupangten an hmunhma an fan thu

Akashvani a hrilh a. Earth day chu ni pawimawh tak, khawvel chenna tlak siam tura chhehvel humhim a tulzia inzirtirna atana hman thin a nih thu a sawi a ni.

<><><>

VBH Jt COMMITTEE

Mizorama kuhva chingtu pawl te chuan kuhva man sa lila-a hralh a ni chu District thuneitute phena kuhva tawlhthu-te samphiar zawm sorkar thuneitu sang zawkte ruahmannaah an ngai tih an sawi. Vairengte Kuhva Chingtu Co-operative Society, Bilkhawthlir Kuhva Chingtu Co-operative Society leh Hachhek Bial Kuhva Chingtu Pawl Joint Committee chuan vawiin khan thuchhuah siamin he thu hi an tarlang a, dan loa ramdang kuhva man sa, Kolasib District Magistrate-in lila-a a hralh chu pawl an ti a. Kuhva tawlhru thinte thil tum leh duhthusam anga roelna kalpui a ni ta mai chu Kuhva chingtute tan a lungchhiat tak zet a ni.

An thuchhuaha an tarlan danin, dan lo a Mizoram a Kuhva tawlhru thinten an kuhva man sa te chu ukil ruaiin lila a tiral turin thuneitute an lo sawipui tawh thin a, amaherawhchu hetiang a kuhva man sa lila-a tihral a nih chuan Mizoram kuhva hralhna a ti chhe leh zual dawn a ni, an ti a, kuhva sawngbawlsa leh dan loa ramdang atanga tawlhruk man tawh lila a hralh theih a nih chuan kum tluanin kuhva tawlhru te tan kawng hawn sakna a ni a, kuhva tawlhru thinten Mizoram sorkar kuta luhtir a, lila hmanga leichhuah leh mai chu an thiltum leh thiam taka an sawi fo thin a ni, an ti.

Mizoram sorkarin Kuhva chingtute aw aia kuhva tawlhru thinte aw a ngaipawimawh zawk ta mai chu mak an ti tih sawiin tun hnu-ah ramdang atanga danlo a kuhva tawlhruk man sa te lila hmanga hralh tawh lo turin thuneitute an ngen tih an sawi a, kuhva lila chu tutenge lei, a leitu tur an thlan dan leh lila chhangtute hming leh an leina rate-te puangzar turin Mizoram sorkar an phut tih an sawi a ni.

Hetihlai hian, Kuhva man sa te tih riral dan tur chungchanga Kolasib District Magistrate in an buaina a sawite chu chhuanlam tlingah an ngailo tih an sawi baw a, a tihralnaa buaina an neih chuan an tihsak thei reng a ni tih thuneitute an hriattir tih an sawi a ni.

<><><>

POL PARTY PR

Mizoram Pradesh Congress Committee MPCC President Pu Lal Thanzara chuan Kuthnathawktute tana inzuar sorkar chuan Kuhva chingtute harsatna thlent u Kuhva tawlh ruk chu sum siam nan chhuanlam siamin an zuar a ti a, ZPM sorkar chu Smuggler lian tia koh theih turin Contraband, Smuggling Goods a man khawm sa a hralh duh chuan a lantir a ti a. Kuthnathawktute leh NGO te rilru thuk takin a hliam a ni, a ti.

MPCC President Pu Lal Thanzara hian Mamit district chhunga khaw hrang hrang - Bawngva, Darlak, Tuidam, Kawrthah, Zamuang, Zawlnuam, Bungthuam, Luimawi, Thinghlun leh Kanmun khuaa Congress party mite a tlawh a, inkawmna hun hmangin Pu Lal Thanzara chuan Mizoram leh Assam ram in rina Thinghlun rama 4th IR battalion camp a tlawh nghal bawk.

Pu Lal Thanzara chuan, Mizoram ah ruihhlo a hluar em em tih sawiin, Minister te pawh Assam rifle hovin an zim a, Mizoram chhungkaw tam tak buaina thlent u Ruihhlo tawlhutute leh a zuartute nena ram hruiatu chu in hnaivai takin an khawsa mek a ni a ti a, heng hmuh hian Mizoram mipui thinlung a ti naa, Kohhran nun a nghawng mek a ni, a ti bawk. Vawiin vek khan MNF Senior Vice President, Dr.R.Lalthangliana leh MNF General Headquarters hruiatu thenkhatte chuan Zampui Phuldungsei tlawhin Tourist Lodge-ah Mizo Convention Zampui aiawhte leh Tripura Group YMA aiawhte nen an kawm a,

He hunah hian MNF Senior Vice President Dr.R.Lalthangliana chuan MNF-in a ngaih pawimawh hmasak ber chu Zofa khawvel hmun hrang hranga awmte insuihkhawm leh tha taka impumkhat a ni a ti a, helai tlangdungah political advantage la tura kal an ni lova, Mizo hnam party, hnam thluthlunga ding an nihna anga kal an ni zawk a ti. MNF hun laiin Thaidawr tlangah Tawngtaina in sakna tur Trade & Commerce atangin cheng nuai 20 vel an pe a, Transport Minister hmalakna in Zampui tlangdung thlengin MST Bus a service tir bawk a ni a ti a, tun hnaiah Minister leh MZP-te pawhin an tlawh chu a lawmawm hle a ni a ti bawk a, tha taka an thawh ho zel chuan harsatna tam tak an sut kuak ngei a rin thu a sawi bawk a ni.

LADC/CADC BUDGET

Ni 5 chhung awh Lai Autonomous District Council Emergency Session chu vawiin khan zawhfel niin, vawiin khan LADC kum 2025-2026 Budget pawm a nih bakah Deputy Chairman thar thlan a ni.

Session tanni kar hmasa Ningani khan LADC a Chief Executive Member, Pu V.Zirsanga chuan LADC Budget 2025-2026 House ah a pharh a, Budget hi House vawiin chawhnu lam khan Eptu lam tellovin pawm a ni.

LADC Budget hi Grant-In-Aid ah Cheng Nuai 25,750, Village Council Remuneration Cheng Nuai 180, Chhiah tlingkhawm atanga hmuhtur cheng Nuai 400 a vaiin cheng Nuai 26,334 a ni.

Budget hi Eptu lam MNF Legislature Party te chuan an pass pui thei lova, an pass pui theihloh chhan an sawi zingah Zirlai / thalai hna zawngten diktaka hna an in chuh theih zirtirtu post 7 nuaibo an duhloh vangte, VC member 128-te hlawh awm lova budget pharh an duhloh vangte, Governor thu anga ni 30 chhunga CEM fiahna Floor test nei lova, budget pharh chu dankalh ni a an hriat vangte chu a langsar zual a ni.

Kumin March 18 a khan LADC a Deputy Chairman Pu H.Lalmuansanga chu a banga, a hmunawl hnawhkhat turin vawiin Session chawhma lam ah Deputy Chairman thlan niin, LADC CHairman Pu T.Zakunga chuan chuhtu awmlovin C.Biakthansangi chu Deputy Chairman atan thlantlin a nih thu a puang a ni. C.Biakthansangi hi Nominated MDC niin, LADC ah Hmeichhia, Deputy Chairman ni hmasa ber a ni a, vawiin khan a Office a luah nghal a ni.

Chakma Autonomous District Council Chairman Pu Lakkan Chakma kaihhruai CADC Budget Session chuan vawiin vek khan kum 2025–2026 budget atan cheng nuai 23,012 an pass a ni.

CADC Budget hi Chief Executive Member, Pu Molin Kumar Chakma-an kar kalta ni 17 khan sessionah a pharh a, sorkar hnathawk leh a kaihhnawih atan cheng nuai 22,067 dah a ni a, hmasawna hnathawh nan cheng nuai 655 leh Village Council inrelbawl nan cheng nuai 145 dah a ni a, CADC sum thawhchhuah ve tur zat chu cheng nuai 145 vela chhut a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime minister Narendra Modia chuan ni hnih cham turin vawiin khan Saudi Arabia khawpui Jeddah a thleng. PM Modia hi airport ah sipai chawimawina famkim nen lo hmuah a ni. Saudi Arabia Crown Prince leh Prime Minister Mohammed bin Salman-a sawmna angin Pu Modia hi Saudi Arabia ah hian a zin a. Tun tum hi a vawi 3 zinna tur niin India leh Saudi Arabia te inkungkaihna thatzia lantirtu a ni.

<><><>

UPSC

Union Public Service Commission (UPSC) chuan vawiin khan civil services exam 2024 result a tihchhuaah Shakti Dubey-i chu pakhatna a ni. Tun tumah examah hian mi 1009 an tling a. An zingah hian mipa 725 leh hmeichhia 284 an awm a. A ti tha 25 zingah hian hmeichhia 11 leh mipa 14 an awm a ni. Nikum Septermber thla khan UPSC chuan written exam buatsaihin kumin January atanga April thla inkarah khan interview a nei bawk a ni.

<><><>